

**Aningaasanoorutit ilaannit iluanaarutinit agguaassisarneq pillugu Inatsisartut  
Inatsisaattut siunnersuut**

(Ilaqutariinnermut, Kultureqarnermut, Ilageeqarnermut Naligiissitaanermullu  
Naalakkersuisoq)

**pillugu**

**Kultureqarnermut, Ilinniartitaanermut, Ilisimatusarnermut, Ilageeqarnermullu  
Ataatsimiititaliap**

**ISUMALIUTISSISSIONAA**

**Siunnersuutip aappassaanneernerani saqqummiunneqartoq**

Ataatsimiititaliaq suliarinninnermini ukuninnga inuttaqarpoq:

Andreas Uldum, Demokratit, Siulittaasup tullia

Harald Bianco, Inuit Ataqatigiit, sinniisussaq

Hans Aronsen, Inuit Ataqatigiit

Ruth Heilmann, Siumut

Aleqa Hammond, Siumut

UKA 2011-mi ulloq 27. september siullermeerinerup kingorna siunnersuut ataatsimiititaliamit misissorneqarpoq.

**Siunnersuutip imarisai siunertaalu**

Aningaasanoorutit ilaat pillugit Kalaallit Nunaannut inatsimmik L 223, 22. marts 2011-meersumik Folketingip akuersissutiginninneranut atatillugu inatsisissatut siunnersuut Naalakkersuisunit saqqummiunneqarpoq. Kalaallit Nunaanni aningaasanoorutinut Namminersorlutik Oqartussanit tiguneqarsimanngitsunit malittarisassat nutaat tamakkiisut inatsisip atuutilersippaa. Tassani ilaatigut pineqarput eqquiniaasitsinerit, eqqoriaasitsinerit internetsikkullu aningaasanoorfii. Inatsit annertuutigut danskit maleruagassaannut assinguvoq, taamaattumillu taassuma kingunerisaanik eqquiniaasitsinernik internetsikkullu aningaasanoorfinnik ingerlatsineq tamakkiisuunngikkaluamik allanut ammaanneqarpoq. Inatsimmi siuliani taaneqartumi § 35 inatsisissatut siunnersuutikkut atuutilersinneqarpoq.

Tamatuma kingunerisaanik tipsernermit lottornermillu iluanaarutinit agguassisarneq aningaasanoorutit ilaannit iluanaarutinit agguassisarnermut allanngortinnejassaaq. Aningaasanoorutit ilaannit iluanaarutinit agguassisarnermi inatsisitigut tunngaviup erseqqissarnejarnissaanik kissaateqarneq siunnersummut tunngaviuvoq.

Siunnersutikkuttaaq kissaatigineqarpoq aningaasanoorutit ilaannit iluanaarutinit agguassisinermut atatillugu tapiiffigineqarsinnaasut, tapeeriaatsit, tapiinermi piumasaqaatit atugassarititaasullu pillugit killigititanik erseqqissaanissaq.

Tapiissutinik qinnuteqartarneq pillugu maleruagassanik assigiinnik aalajangersaanissamut Naalakkersuisut periarfissaqalernissaat inatsisissatut siunnersutikkut qulakkeerneqassaaq.

### **Siunnersutip Inatsisartuni siullermeerlugu suliarineqarnera**

#### **Inuit Ataqatigiit aamma Kattusseqatigiit Partiat**

Annertunerusumik oqaaseqaatitaqartinnagu Inuit Ataqatigiit aamma Kattusseqatigiit Partiat siunnersuut tamakkiisumik taperserpaat.

#### **Siumut**

Siumut inatsisissatut siunnersuut taperserpaat, kisianni inatsisissatut siunnersummi nalinginnaasumik oqaaseqaatini imm. 2-imi oqaaseqatigiinni paatsuunganartitaqarlutik.

#### **Demokraatit**

Demokraatit isumaqarput, ersarissunik paasuminartunillu malittarisassaqartariaqartoq, nalunaarutigalugu Naalakkersuisut Nalunaarummik suliaqarnissaat.

#### **Atassut**

Aningaasanoorutit ilaannit iluanaarutinit agguassisarneq pillugu Inatsisartut Inatsisaattut siunnersummut annertunerusumik oqaasseqaateqarnatik ATASSUTIP siunnersuut taperserpaat.

#### **Inersuarmi oqallinneq**

Immikkoortumut pineqartumut Naalakkersuisoq oqaaseqareermat, inersuarmit Siumut oqaaseqartuanit apeqqutigineqarpoq annertunerusumik paasisaqrfiginiarlugu manna:  
Sooq oqaaseqaatini imm. 2-imi (qup 2-imi) inatsisissatut siunnersummi nalinginnaasumik oqaaseqaatini imatut allasssimasoqarnersoq.

*"Tamatuma Kalaallit Nunaannut aningaasatigut sunniuteqarnissaa pinngitsoorniarlugu  
 Inatsisissatut siunnersuutikkut anguniarneqarpoq aningaasanik Kalaallit Nunaannut  
 agguagassiiresarnerup siunissami aningaasanoorutinit aalajangersimasunit isertitaasussanit  
 avissaartinneqalernissaa, tassa maleruagassat atuuttut malillugit aningaasat kingullerpaamik  
 tunniunneqartut annertoqqataannik aningaasanut inatsimmi immikkoortitsinikkut. Ukiut  
 naatsorsuuteqarfiusumut 2010-mut Kalaallit Nunaanni pinnguaatininit sinneqartooraasut  
 29,5 mio.kr. missaanniippus. L 223, 22. marts 2011-meersoq Aningaasanoorutit ilaat pillugit  
 Kalaallit Nunaannut Inatsit aqqutigalugu taamaalilluni qularnaarneqassaaq aningaasat  
 taakku 2010-mi ukiunilu tulliuttuni tunniunneqartarnissaat. Danske Spil-ip Kalaallit  
 Nunaanni aningaasanoorutitigut isertitaanit sinneqartooraasut ilanngarneqaratik danskit  
 naalagaaffiata karsianut nakkartassapput."*

Oqaaseqartup paasinninna malillugu aningaasanoorutit ilaannit iluanaarutinit qanoq annertutigisumik Kalaallit Nunaata pissarsisarnissaa inatsisissatut siunnersuummi pineqanngilaq, pineqarlunili aningaasanik agguassisarneq. Taamaattumillu inatsisissatut siunnersuummut nassuaatini Naalakkersuisut taassuminnga ilanngussisimanerat oqaaseqartup tupigusuutigaa.

Ilaqtariinnermut, Kultureqarnermut, Ilageeqarnermut Naligiissitaanermullu Naalakkersuisoq naggataarutaasunik oqaaseqarnermi Siumullu oqaaseqartuata apeqqutaanut akissuteqarnermini oqarpoq siunissami aningaasat 99 mio. kr.-it agguanneqartassasut. Tamatuma kinguneranik Siumup oqaaseqartuata aammaarluni naqqiutigaa nassuaatini siuliani taaneqartuni aningaasat oqaatigineqartut eqqortut tassaasut 29,5 mio. kr.-it.

Apeqqut siuliani taaneqartoq naqqiinerlu tunngavigalugit Ilaqtariinnermut, Kultureqarnermut, Ilageeqarnermut Naligiissitaanermullu Naalakkersuisup neriorsuutigaa Siumup oqaaseqartuanut pineqartoq pillugu allakkatigut akissuteqassalluni.

### Tusarniaanermut akissutit

Tusarniaanermut akissuteqarnissamut sapaatip akunneri tallimat sinnilaarlugit piffissaliisoqarpoq, taannalu 27. juni 2011-mi qaangiuppoq. Tusarniaanermut killissaritinneqartup qaangiunnerani peqatigiiffiit, kattuffiit suliffeqarfiallu 30-it tusarniaanermik nassiussiffingineqarsimasut ilaannit arfineq pingasunit akissutit tiguneqarput.

Tusarniaanermi killissaritinneqartoq aasaanerani sulinngiffeqarnerup nalaaniinnera tusarniaaffigineqartut amerlanerit akissuteqanngitsoorneranut pissutaasinnaavoq.

Kattuffimmit ataatsimit peqatigiiffimmillu ataatsimit allannguutissatut siunnersuutigineqartut ilanngunneqarnissaasa Naalakkersuisunit kissaatigineqarsimannginnaa pillugu ataatsimiitaliaq annertunerusumik oqaaseqaatissaqanngilaq. Tamatumani tunngaviuvoq pissutsit immikkut ittut, assersuutigalugu “Avalak”-ip § 3, imm. 3-mi immikkut taaneqarsimanera, pillugit tunngavilersuutit piviusut tusarniaaneq pillugu Naalakkersuisut allakkiaanni ilanngunneqarsimanerat. Kiisalu § 1-mi %-lersuineq aalajangersimasunik sulialinnut qaffanneqassasoq kissaatigineqarsimavoq, taamaalilluni aningaasanik agguassisarneq naligiinnerusumik pisinnaaqquullugu. Naalakkersuisuusimasut procentinngorlugu agguassisarneq pillugu 1. juli 1998-mi aalajangersagaannik aalajangiusimanninnissamik kissaateqarneq tunngavilersuutigalugu Naalakkersuisut tamanna itigartippaat. Procentinngorlugu agguassisarneq tamanna Inatsisartut inatsisaanniit nr. 13-imit, 11. november 2000-imeersumit ingerlateqqitaavoq. Taamanikkut Inatsisartut tipsernermik lottorermillu iluanaarutinik agguassisarneq pillugu inatsisisaattut siunnersuutip 15. august 2000 UKA 2000/28-ip suliarineqarnerani aamma ataatsimiitaliap UKA00/28-mut isumaliutissiissutaani procentinik agguasarneq imatut tunngavilersorneqarsimavoq.

*“Inatsisissatut siunnersuummi takuneqarsinnaavoq timersornermut immikkoortitat tamarmiusut tipsernermit lottorermillu iluanaarutit 59,1 %-erigaat. Siunnersuummut nalinginnaasumik nassuaatini oqaatigineqarpoq 1998-imi 1. julip siornanut sanilliullugu tamanna qaffariarnerusoq, tamannami sioqquullugu timersornermut immikkoortitat tamarmiusut tipsernermit lottorermillu iluanaarutit 40,7 %-iinnarisimavaat. Ilanngullugu oqaatigineqarpoq qaffaanermut pingaarnertut pissutaasoq tassaammat immikkoortitanit taakkuninnga timersortartut innarluutillit utoqqaallu pissarsitinneqarnissaat aamma qulakkeerneqartussaammat, soorluttaaq piukkunnaatillittut pikkinnertullu timersortartunut agguanneqartartut, ilaatigut angallannermut aningaasartuutit annertungaatsiarnerat pissutigalugu, qaffanneqarsimasut. Ataatsimiitaliamit pitsaasutut isigineqarpoq innarluutillit utoqqaallu timersornerata, taamatullu piukkunnaatillit pikkinnerillu timersornerat immikkoortitanit pissarsitinneqarnissaasa inatsisissatut siunnersuutikkut qulakkeerneqarnerat.*

*Timersornerup tungaatigut allatigullumi nunarsuup sinneranut saakkiartuaarneq nunatsinnut sinnisiuullutik angalasut angalanermut il.il. aningaasartuutaasa annertunerulererannik kinguneqarpoq. Taamaattorli Naalakkersuisut agguassassinissamut siunnersuutaat imaattoq ataatsimiitaliamit taperserneqarpoq; 1) 50 %-it timersornernut tamanit peqataaffigineqarsinnaasunut, innarluutillit utoqqaallu timersornerat ilanngullugu, 2) 9,1 %-it piukkunnaatillit pikkorinnerillu timersornerinut, 3) 13,6 %-it meeqqat inuusuttullu pillugit siunertanut aamma 4) 27,3 %-it tamanut iluaqutaasumik siunertanut allanut, taakkunani ilaallutik kulturimut tunngasut, innuttaasunik qaammarsaaneq, nappaatinik akiuiniarneq pinaveersaartitsinerlu, inooqatigiinnermut tunngasunik siunertat, asimiititsinissamik siunertat aammalu tamanut iluaqutaasussamik ilisimatusarnerit.”*

### **Ataatsimiitaliap siunnersummik suliarinninera**

Annertunerusumik oqaaseqaateqarfiginagu ataatsimiitaliap taamatut isikkoqartillugu akuersissutigineqarnissaa inassutigaat.

### **Siunnersuutip aningaasatigut kingunissai**

Inatsisisstatut siunnersuutip piviusunngortinneqarnerata aningaasatigut kingunerisassai siunnersummut nalinginnaasumik nassuaatini nassuaatigineqarput. Tassani allassimavoq siunnersuut allaffissornikkut aningaasatigulluunniit pisortanut kinguneqassanngitsoq. Taamatullu inatsisisstatut siunnersuut inuussutissarsiortunut allanut allaffissornikkut aningaasatigulluunniit kinguneqartussatut naatsorsuutigineqanngilaq.

## **Ataatsimiititaliap inassuteqaatai**

Tamanna tunngavigalugu **ataatsimiititaliap isumaqatigiittup** siunnersuut  
Akuersissutigineqassasoq inassutigaa.

Taamatut oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassannngortippaa.

---

Andreas Uldum

Siulittaasup tullia

---

Harald Bianco,

sinniisussaq

---

Hans Aronsen

---

Ruth Heilmann

---

Aleqa Hammond